

2 Tīmuthiyus

¹ Yih khat Paulus kī taraf se hai jo Allāh kī marzī se Masīh Īsā kā rasūl hai tāki us wādā kī huī zindagī kā paighām sunāe jo hamēñ Masīh Īsā meñ hāsīl hotī hai.

² Maiñ apne pyāre beṭe Tīmuthiyus ko likh rahā hūñ.

Ḳhudā Bāp aur hamārā Ḳhudāwand Masīh Īsā āp ko fazl, rahm aur salāmatī atā karen.

Shukrguzārī aur Hauslā-afzāī

³ Maiñ āp ke lie Ḳhudā kā shukr kartā hūñ jis kī k̄hidmat maiñ apne bāpdādā kī tarah sāf zamīr se kartā hūñ. Dīn rāt maiñ lagātār āp ko apnī duāoñ meñ yād rakhtā hūñ.

⁴ Mujhe āp ke ānsū yād āte haiñ, aur maiñ āp se milne kā ārzūmand hūñ tāki k̄hushī se bhar jāūñ.

⁵ Mujhe k̄hāskar āp kā muḳhlis īmān yād hai jo pahle āp kī nānī Lūis aur māñ Yūnike rakhtī thīñ. Aur mujhe yaqīn hai ki āp bhī yihī īmān rakhte haiñ.

⁶ Yihī wajah hai ki maiñ āp ko ek bāt yād dilātā hūñ. Allāh ne āp ko us waqt ek nemat se nawāzā jab maiñ ne āp par hāth rakhe. Āp ko us nemat kī āg ko nae sire se bharḱāne kī zarūrat hai.

⁷ Kyoñki jis Rūh se Allāh ne hamēñ nawāzā hai wuh hamēñ buzdīl nahīñ banātā balki hamēñ quwwat, muhabbat aur nazm-o-zabt dilātā hai.

⁸ Is lie hamāre Ḳhudāwand ke bāre meñ gawāhī dene se na sharmāeñ, na mujh se jo

Masīh kī khātir qaidī hūn. Is ke bajāe mere sāth Allāh kī quwwat se madad le kar us kī khushkhabrī kī khātir dukh uṭhāen.

⁹ Kyoṅki us ne hamēn najāt de kar muqaddas zindagī guzārne ke lie bulāyā. Aur yih chīzeṅ hamēn apnī mehnat se nahīn milīn balki Allāh ke irāde aur fazl se. Yih fazl zamānoṅ kī ibtidā se pahle hamēn Masīh meṅ diyā gayā

¹⁰ lekin ab hamāre Najātdahindā Masīh Īsā kī āmad se zāhir huā. Masīh hī ne maut ko nest kar diyā. Usī ne apnī khushkhabrī ke zariye lāfanī zindagī raushnī meṅ lā kar ham par zāhir kar dī hai.

¹¹ Allāh ne mujhe yihī khushkhabrī sunāne ke lie munād, rasūl aur ustād muqarrar kiyā hai.

¹² Isī wajah se main dukh uṭhā rahā hūn. To bhī main sharmātā nahīn, kyoṅki main use jāntā hūn jis par meṅ imān lāyā hūn, aur mujhe pūrā yaqīn hai ki jo kuchh main ne us ke hawāle kar diyā hai use wuh apnī āmad ke din tak mahfūz rakhne ke qābil hai.

¹³ Un sehhatbaḥsh bātoṅ ke mutābiq chalte raheṅ jo āp ne mujh se sun lī haiṅ, aur yoṅ imān aur muhabbat ke sāth Masīh Īsā meṅ zindagī guzāreṅ.

¹⁴ Jo beshqīmat chīz āp ke hawāle kar dī gāī hai use Rūhul-quds kī madad se jo ham meṅ sukūnat kartā hai mahfūz rakheṅ.

¹⁵ Āp ko mālūm hai ki sūbā Āsiyā meṅ tamām logoṅ ne mujhe tark kar diyā hai. In meṅ Fūgilus aur Hirmughines bhī shāmil haiṅ.

¹⁶ Khudāwand Unesifurus ke gharāne par rahm kare, kyoṅki us ne kāī dafā mujhe tar-o-

tāzā kiyā. Hān, wuh is se kabhī na sharmāyā ki main qaidī hūn.

¹⁷ Balki jab wuh Rom Shahr pahuñchā to baṛī koshishoñ se merā khoj lagā kar mujhe milā.

¹⁸ Ḳhudāwand kare ki wuh qiyāmat ke din Ḳhudāwand se rahm pāe. Āp ḳhud behtar jānte haiñ ki us ne Ifisus meñ kitnī ḳhidmat kī.

2

Masīh Īsā kā Wafādār Sipāhī

¹ Lekin āp, mere beṭe, us fazl se taqwiyat pāeñ jo āp ko Masīh Īsā meñ mil gayā hai.

² Jo kuchh āp ne bahut gawāhoñ kī maujūdagī meñ mujh se sunā hai use motabar logoñ ke sapurd kareñ. Yih aise log hoñ jo auroñ ko sikhāne ke qābil hoñ.

³ Masīh Īsā ke achchhe sipāhī kī tarah hamāre sāth dukh uṭhāte raheñ.

⁴ Jis sipāhī kī ḍyūṭī hai wuh ām riāyā ke muāmalāt meñ phañsne se bāz rahtā hai, kyoñki wuh apne afsar ko pasand ānā chāhtā hai.

⁵ Isī tarah khel ke muqābale meñ hissā lene wāle ko sirf is sūrat meñ inām mil saktā hai ki wuh qawāyd ke mutābiq hī muqābalā kare.

⁶ Aur lāzim hai ki fasal kī kaṭāī ke waqt pahle us ko fasal kā hissā mile jis ne khet meñ mehnat kī hai.

⁷ Us par dhyān denā jo main āp ko batā rahā hūn, kyoñki Ḳhudāwand āp ko in tamām bātoñ kī samajh atā karegā.

⁸ Masīh Īsā ko yād rakheñ, jo Dāūd kī aulād meñ se hai aur jise murdoñ meñ se zindā kar diyā gayā. Yihī merī khushkhabrī hai

⁹ jis kī khātir main dukh uṭhā rahā hūñ, yahāñ tak ki mujhe ām mujrim kī tarah zanjīroñ se bāndhā gayā hai. Lekin Allāh kā kalām zanjīroñ se bāndhā nahīñ jā saktā.

¹⁰ Is lie main sab kuchh Allāh ke chune hue logoñ kī khātir bardāsht kartā hūñ tāki wuh bhī najāt pāeñ—wuh najāt jo Masīh Īsā se miltī hai aur jo abadī jalāl kā bāis bantī hai.

¹¹ Yih qaul qābil-e-etamād hai,
agar ham us ke sāth mar gae
to ham us ke sāth jieñge bhī.

¹² Agar ham bardāsht karte raheñ
to ham us ke sāth hukūmat bhī kareñge.
Agar ham use jānane se inkār kareñ
to wuh bhī hameñ jānane se inkār karegā.

¹³ Agar ham bewafā nikleñ
to bhī wuh wafādār rahegā.
Kyoñki wuh apnā inkār nahīñ kar saktā.

Qābil-e-Qabūl Khidmatguzār

¹⁴ Logoñ ko in bātoñ kī yād dilāte raheñ aur unheñ sanjīdagī se Allāh ke huzūr samjhāeñ ki wuh bāl kī khāl utār kar ek dūsre se na jhagareñ. Yih befāydā hai balki sunane wāloñ ko bigār detā hai.

¹⁵ Apne āp ko Allāh ke sāmne yoñ pesh karne kī pūrī koshish kareñ ki āp maqbūl sābit hoñ, ki āp aisā mazdūr nikleñ jise apne kām se sharmāne kī zarūrat na ho balki jo sahīh taur par Allāh kā sachchā kalām pesh kare.

16 Duniyāwī bakwās se bāz raheñ. Kyoñki jitnā yih log is meñ phañs jāeñge utnā hī bedinī kā asar baṛhegā

17 aur un kī tālīm kainsar kī tarah phail jāegī. In logoñ meñ Huminyus aur Filetus bhī shāmil haiñ

18 jo sachchāī se haṭ gae haiñ. Yih dāwā karte haiñ ki murdoñ ke jī uṭhne kā amal ho chukā hai aur yoñ bāz ek kā imān tabāh ho gayā hai.

19 Lekin Allāh kī ṭhos buniyād qāym rahtī hai aur us par in do bātoñ kī muhr lagī hai, “Ḳhudāwand ne apne logoñ ko jān liyā hai” aur “Jo bhī samjhe ki main Ḳhudāwand kā pairokār hūñ wuh nārāstī se bāz rahe.”

20 Baṛe gharoñ meñ na sirf sone aur chāñdī ke bartan hote haiñ balki lakaṛī aur miṭṭī ke bhī. Yānī kuchh sharīf kāmoñ ke lie istemāl hote haiñ aur kuchh kamqadar kāmoñ ke lie.

21 Agar koī apne āp ko in burī chīzoñ se pāk-sāf kare to wuh sharīf kāmoñ ke lie istemāl hone wālā bartan hogā. Wuh maḵsūs-o-muqaddas, mālik ke lie mufid aur har nek kām ke lie taiyār hogā.

22 Jawānī kī burī ḳhāhishāt se bhāg kar rāstbāzī, imān, muhabbat aur sulah-salāmatī ke pīchhe lage raheñ. Aur yih un ke sāth mil kar kareñ jo ḳhulūdilī se Ḳhudāwand kī parastish karte haiñ.

23 Hamāqat aur jahālat kī bahsoñ se kinārā kareñ. Āp to jānte haiñ ki in se sirf jhagaṛe paidā hote haiñ.

24 Lāzim hai ki Ḳhudāwand kā ḳhādim na jhagaṛe balki har ek se mehrbānī kā sulūk kare. Wuh tālīm dene ke qābil ho aur sabar se ḡhalat

sulūk bardāsht kare.

²⁵ Jo muḵhālafat karte haiñ unheñ wuh nar-mdilī se tarbiyat de, kyonki ho saktā hai ki Allāh unheñ taubā karne kī taufīq de aur wuh sachchāi ko jān leñ,

²⁶ hosh meñ āeñ aur Iblīs ke phande se bach nikleñ. Kyonki Iblīs ne unheñ qaid kar liyā hai tāki wuh us kī marzī pūrī kareñ.

3

Āḵhirī Din

¹ Lekin yih bāt jān leñ ki āḵhirī dinoñ meñ haulnāk lamhe āeñge.

² Log ḵhudpasand aur paison ke lālchī hoñge. Wuh sheḵhībāz, maḡhrūr, kufr bakne wāle, mān-bāp ke nāfarmān, nāshukre, bedīn

³ aur muhabbat se ḵhālī hoñge. Wuh sulah karne ke lie taiyār nahīñ hoñge, dūsroñ par tohmat lagāeñge, aiyāsh aur wahshī hoñge aur bhalāi se nafrat rakheñge.

⁴ Wuh namak-harām, ḡhairmuhtāt aur ḡhurūr se phūle hue hoñge. Allāh se muhabbat rakhne ke bajāe unheñ aish-o-ishrat pyārī hogī.

⁵ Wuh bazāhir ḵhudātars zindagī guzāreñge, lekin haqīqī ḵhudātars zindagī kī quwwat kā inkār kareñge. Aison se kinārā kareñ.

⁶ Un meñ se kuchh log gharoñ meñ ghus kar kamzor ḵhawātīn ko apne jāl meñ phaṅsā lete haiñ, aisī ḵhawātīn ko jo apne gunāhoñ tale dabī huī haiñ aur jinheñ kāi tarah kī shahwateñ chalātī haiñ.

⁷ Go yih har waqt tālīm hāsil kartī rahtī haiñ to bhī sachchāī ko jānane tak kabhī nahīn pahuñch saktīñ.

⁸ Jis tarah Yannes aur Yambres Mūsā kī muḡhālafat karte the usī tarah yih log bhī sachchāī kī muḡhālafat karte haiñ. In kā zahan bigarā huā hai aur in kā īmān nāmaqbul niklā.

⁹ Lekin yih zyādā taraqqī nahīn kareñge kyonki in kī hamāqat sab par zāhir ho jāegī, bilkul usī tarah jis tarah Yannes aur Yambres ke sāth bhī huā.

Ākhirī Hidāyāt

¹⁰ Lekin āp har lihāz se mere shāgird rahe haiñ, chāl-chalan meñ, irāde meñ, īmān meñ, sabar meñ, muhabbat meñ, sābitqadmī meñ,

¹¹ izārasāniyoñ meñ aur dukhoñ meñ. Antākiyā, Ikuniyum aur Lustrā meñ mere sāth kyā kuchh na huā! Wahāñ mujhe kitnī sakht izārasāniyoñ kā sāmna karnā parā. Lekin Ḳhudāwand ne mujhe in sab se rihāī dī.

¹² Bāt yih hai ki sab jo Masīh Īsā meñ Ḳhudātars zindagī guzārnā chāhte haiñ unheñ satāyā jāegā.

¹³ Sāth sāth sharīr aur dhokebāz log apne ḡhalat kāmoñ meñ taraqqī karte jāenge. Wuh dūsroñ ko ḡhalat rāh par le jāenge aur unheñ Ḳhud bhī ḡhalat rāh par lāyā jāegā.

¹⁴ Lekin āp Ḳhud us par qāym raheñ jo āp ne sīkh liyā aur jis par āp ko yaqīn āyā hai. Kyonki āp apne ustādoñ ko jānte haiñ

¹⁵ aur āp bachpan se muqaddas sahīfoñ se wāqif haiñ. Allāh kā yih kalām āp ko wuh

hikmat atā kar saktā hai jo Masīh Īsā par īmān lāne se najāt tak pahuñchātī hai.

¹⁶ Kyoñki har pāk nawishtā Allāh ke Rūh se wujūd meñ āyā hai aur tālīm dene, malāmat karne, islāh karne aur rāstbāz zindagī guzārne kī tarbiyat dene ke lie mufid hai.

¹⁷ Kalām-e-muqaddas kā maqsad yihī hai ki Allāh kā bandā har lihāz se qābil aur har nek kām ke lie taiyār ho.

4

¹ Main Allāh aur Masīh Īsā ke sāmne jo zindon aur murdon kī adālat karegā aur us kī āmad aur bādshāhī kī yād dilā kar sanjīdagī se is kī tākīd kartā hūñ,

² ki waqt bewaqt kalām-e-muqaddas kī munādī karne ke lie taiyār raheñ. Bāre sabar se īmāndāron ko tālīm de kar unheñ samjhāeñ, malāmat kareñ aur un kī hauslā-afzāi bhī kareñ.

³ Kyoñki ek waqt āegā jab log sehhatbākhsh tālīm bardāsht nahīñ kareñge balki apne pās apnī burī khāhishāt se mutābiqat rakhne wāle ustādon kā dher lagā leñge. Yih ustād unheñ sirf dil bahlāne wālī bāteñ sunāeñge, sirf wuh kuchh jo wuh sunanā chāhte haiñ.

⁴ Wuh sachchāi ko sunane se bāz ā kar farzī kahāniyon ke pīchhe paṛ jāeñge.

⁵ Lekin āp khud har hālat meñ hosh meñ raheñ. Dukh ko bardāsht kareñ, Allāh kī khushkhabrī sunāte raheñ aur apnī khidmat ke tamām farāyz adā kareñ.

⁶ Jahān tak merā tālluq hai, wuh waqt ā chukā hai ki mujhe mai kī nazar kī tarah qurbāngāh par unḍelā jāe. Mere kūch kā waqt ā gayā hai.

⁷ Maiñ ne achchhī kushtī laṛī hai, maiñ daur ke iḁhtitām tak pahuñch gayā hūñ, maiñ ne imān ko mahfūz rakhā hai.

⁸ Aur ab ek inām taiyār paṛā hai, rāstbāzī kā wuh tāj jo Ḵhudāwand hamārā rāst munsif mujhe apnī āmad ke din degā. Aur na sirf mujhe balki un sab ko jo us kī āmad ke ārzūmand rahe haiñ.

Kuchh Shaḁhsī Bāteñ

⁹ Mere pās āne meñ jaldī karen.

¹⁰ Kyoñki Demās ne is duniyā ko pyār karke mujhe chhoṛ diyā hai. Wuh Thissalunīke chalā gayā. Kreskens Galatiyā aur Titus dalmatiyā chale gae haiñ.

¹¹ Sirf Lūqā mere pās hai. Marqus ko apne sāth le ānā, kyoñki wuh ḁhidmat ke lie mufīd sābit hogā.

¹² Tuḁhikus ko maiñ ne Ifisus bhej diyā hai.

¹³ Āte waqt merā wuh kūṭ apne sāth le āeñ jo maiñ Troās meñ Karpus ke pās chhoṛ āyā thā. Merī kitābeñ bhī le āeñ, ḁhāskar charmī kāḁhaz wālī.

¹⁴ Sikandar lohār ne mujhe bahut nuqsān pahuñchāyā hai. Ḵhudāwand use us ke kām kā badlā degā.

¹⁵ Us se muhtāt raheñ kyoñki us ne baṛī shiddat se hamārī bātoñ kī muḁhālafat kī.

¹⁶ Jab mujhe pahlī dafā apne difā ke lie adālat meñ pesh kiyā gayā to sab ne mujhe tark kar

diyā. Allāh un se is bāt kā hisāb na le balki ise nazarandāz kar de.

¹⁷ Lekin Ḳhudāwand mere sāth thā. Usī ne mujhe taqwiyyat dī, kyoṅki us kī marzī thī ki mere wasīle se us kā pūrā paighām sunāyā jāe aur tamām Ḡhairyahūdī use suneñ. Yoñ Allāh ne mujhe sherbabar ke muñh se nikāl kar bachā liyā.

¹⁸ Aur āge bhī Ḳhudāwand mujhe har sharīr hamle se bachāegā aur apnī āsmānī bādshāhī meñ lā kar najāt degā. Us kā jalāl azal se abad tak hotā rahe. Āmīn.

Ākhirī Salām

¹⁹ Priskillā, Akwilā aur Unesifurus ke gharāne ko hamārā salām kañā.

²⁰ Irāstus Kurinthus meñ rahā, aur mujhe Trufimus ko Miletus meñ chhoṛnā paṛā, kyoṅki wuh bīmār thā.

²¹ Jaldī karen tākī sardiyoñ ke mausam se pahle yahāñ pahuñcheñ.

Yūbūlus, Pūdēns, Līnus, Klaudiyā aur tamām bhāī āp ko salām kahte haiñ.

²² Ḳhudāwand āp kī rūh ke sāth ho. Allāh kā fazl āp ke sāth hotā rahe.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30